

**MEĐUNARODNA KONFERENCIJA "INTEGRALNI PRISTUP
SOCIJALNOM UKLJUČENJU ROMA KROZ STAMBENO
ZBRINJAVANJE I ZAPOŠLJAVANJE"**

17.-21.5.2015.godine

Pozdravni govor, 19.5.2015. godine, u 10,00 časova:

Poštovane dame i gospodo, cijenjeni gosti,

Dozvolite mi da vas pozdravim i zaželim dobrodošlicu u svoje ime i u ime Ministarstva za ljudska prava i izbjeglice BiH. Kao što vam je poznato Bosna i Hercegovina je 01.07.2014. godine preuzela predsjedavanje Dekadom uključenja Roma 2005-2015, te kao Nacionalni koordinator za rješavanje problema Roma u Bosni i Hercegovini imam čast da vas pozdravim i zaželim ugodan boravak u Sarajevu.

Tokom predsjedavanja Dekadom Bosna i Hercegovina je organizovala 27.-u sjednicu Međunarodnog Upravnog komiteta, dvije međunarodne konferencije pod nazivom „Imaju li Romkinje pravo na siguran život?“ i „Inkluzivno obrazovanje bez diskriminacije“. Imali smo čast i da organizujemo sastanak Komiteta eksperata Vijeća Evrope za romska pitanja (CAHROM), u oktobru 2014. godine.

Na događajima vezanim za predsjedavanje Dekadom, učestvovali su predstavnici država članica Dekade, države posmatrači, međunarodne organizacije, romski nevladin sektor, predstavnici Svjetske banke, Sekretarijata Dekade, kao i drugi uvaženi gosti. Ispred Bosne i Hercegovine su bile uključene sve relevantne državne institucije, romski nevladin sektor i međunarodne organizacije. Možemo istaći da su svi ovi događaji bili plodotvorni i da su ispunili svoju svrhu.

I u nastavku uloge predsjedavanja Bosne i Hercegovine Dekadom uključenja Roma, nastaviti ćemo praksu razmjene iskustava o realizaciji politika usmjerenih na proces uključenja romske populaciji uz poštovanje načela Deklaracije o pristupanju Dekadi i približenja ovog procesa standardima koje zagovara Evropska unija.

Svima vam je poznato da je Bosna i Hercegovina najveći uspjeh postigla u rješavanju stambenog zbrinjavanja Roma. Redovno planiramo finansijska sredstva u budžetu, na državnom nivou, u iznosu od oko 1,5 milion EUR, od čega je 1 milion EUR namjenjen stambenom zbrinjavanju Roma.

Od 2009.-2014. godine postigli smo slijedeće rezultate:

- Ukupna uložena sredstva su **12.000.000 EUR**, uključujući budžetska, donatorska i sredstva sufinansiranja od strane implementatora i lokalne vlasti,
- Projekti su realizovani u više od **60** opština
- Do sada je izgrađeno ili rekonstruisano oko **740** stambenih jedinica, uključujući i IPA sredstva, u iznosu od 2,5 miliona EUR, u prvoj fazi,
- Preko **1.000** romskih porodica su bili korisnici projekata infrastrukture.

Što se tiče zapošljavanja, svake godine izdvajamo sredstva za zapošljavanje Roma, koja se plasiraju preko nadležnih Zavoda za zapošljavanje. Do sada je 475 Roma bilo uključeno u projekte zapošljavanja.

Svjesni smo da svi zajedno moramo više uložiti napora na održivom zapošljavanju romske populacije. Želimo primijeniti integralni pristup, tj. uz stambeno zbrinjavanje pokušati naći modele zapošljavanja.

Cilj ove konferencije je da svi zajedno pronađemo put za taj integralni pristup stambenom zbrinjavanju i zapošljavanju Roma.

Ovo je prilika da razmijenimo pozitivna iskustva iz zemalja članica Dekade, koja će nam svima koristiti.

Bosna i Hercegovina je opredijeljena da nastavi realizaciju svih planova i aktivnosti u cilju poboljšanja uslova života romske populacije i bržeg integrisanja u društvo. Činimo sve kako bismo postigli više rezultata u sklopu raspoloživih finansijskih sredstava.

Na kraju, ovom prilikom, želim da istaknem posebnu zahvalnost svima koji nam pomažu da ostvarimo naše ciljeve, a prvenstveno Evropskoj komisiji, UNDP-u, OSCE-u, CARITAS-u Švicarske, Kali Sara-romskom informativnom centru, predstavnicima institucija i lokalne vlasti, ostalim međunarodnim i nevladinim organizacijama, a najviše romskoj populaciji s kojima smo ravnopravan partner.

Svim učesnicima ove konferencije želim uspješan i plodotvoran rad.

